

卷六

書名 漢蔡中郎集六卷 嘉靖二十七年序任城楊賢刊本
 撰者 漢 蔡邕 撰，明 喬世寧，明 俞憲 校訂
 卷 卷六
 內容分類 集-別集 漢魏六朝 漢
 索書號 倉石40022
 編號 4002100

[彩色首頁1](#)

[東洋文化研究所漢籍目錄 編號: 4002100](#)

[東洋文化研究所漢籍目錄所藏漢籍善本全文影像資料庫 索書號: 倉石40022](#)

[漢籍善本全文影像資料庫文本 漢蔡中郎集六卷 嘉靖二十七年序任城楊賢刊本](#)

版權所有: [東京大學](#), [東洋文化研究所](#)
[使用上的注意事項](#)

漢蔡中郎集卷之一

明 役 羽 喬 世 寧 景 叔 無 錫 俞 憲 汝 成 校 訂 任
 城 楊 賢 子 庸 梓 行

獨斷

天子正號曰皇帝自稱曰朕臣民稱之曰陛下其言
 制詔史官記事曰上車馬衣服器械百物曰乘輿所
 行在所所居曰禁中後曰省中印曰璽所至曰幸
 曰御其命令一曰策書二曰制書三曰詔書四曰

漢蔡中郎集卷之五終

漢蔡中郎集卷之六

商氏伯子家藏

明校尉喬世寧景叔無錫俞憲汝成校訂任

城楊賢子庸梓行

太尉汝南李公碑

公諱咸字元卓汝南西平人蓋秦將李信之後孝武大將軍廣之曾也枝流葉布家于茲土文武繼踵世為著姓曾祖父江夏太守伯父東郡太守公受純懿之資萃忠清之節夙夜嚴慄孝配大舜敦詩書而悅禮樂觀天文而察地理動與神合辨抗流行操邁伯夷德追孔父

舉孝廉除郎中光祿茂才遷衛國公相受高密令勤恤
民隱政成功簡遷徐州刺史百司震肅饗養風靡惡直
醜正恭事法宮帝念其勤屢被榮命漁陽太守還遷度
遼將軍協德魏絳和我綏邊徵河南尹母憂乞行服闋
奔命孝和皇帝時機密久缺百僚僉允詔休尚書歷僕
射令納言危行不絀以公事去民神憤怒群公薦之帝
曰俞哉徵拜將作大匠大司農大鴻臚大僕射公所蒞
任憲天心以教旨激垢濁以揚清懿鑠之美昭登于上
丕顯之化宣聞于下及遷台司位太尉補袞闕叙彝倫

天人交格終始無疵雖元凱翼虞周召輔姬未之或踰
功遂身退以疾自遜求歸田里告老致仕七十有六嘉
平四年薨海內咨嗟莫不惻焉故吏潁川太守張溫等
相與嘆曰名莫隆於不朽德莫盛於萬世銘勒顯于鍾
鼎清烈光于來裔刊石立碑德載不泯詞曰天垂三台
地建五岳降生我哲應鼎之足奕世載德名昭圖錄旣
文且武桓桓紹續外則折衝內則大麓惟清惟敏品物
以熙告老懸車天人靡欺曾不百齡圯我國基人之云
亡八極悼思申德作頌光寵宣流鑄紀斯石鴻烈顯休

劉鎮南碑

君諱表字景升山陽高平人也君應期挺生瑰偉大度
黃中通理博物多識爲郡功曹千里稱平上計吏辟大
將軍府遷比軍中侯在位十旬以賢能特選拜刺史荆
州末平元年十一月到官清風先驅莫不震肅奸宄改
節不仁引頸君乃頒愷悌流惠和慕唐叔之野棠思王
遵之驅印賦政造次德化宣行俄而漢室大亂禍起蕭
牆賊臣專政豪雄虎爭縣邑閭里奸宄煙燄州縣殘破
天下土崩四海大壞當是時也雖有孔翟之聖賢育黃

之勇勢無所措其智力君遇險而建畧遭難而發權招
命英俊爰得驍雄謀臣武將合策明計出次北境遷止
漢陰因滄浪以爲隍即春葉以爲墉南撫衡陽東綏淄
沂西靖巫山保乂四疆選才任良式序賢能簡將命卒
綦布星陳備要塞之戍八方之邊勸穡務農以田以漁
稔粟紅腐年穀豐夥江湖之中無劫掠之寇沅湘之間
無攘竊之民郡守令長冠帶章服府寺亭鄉崇棟高門
皆如其舊當世知名輻輳而至四方襁負自遠若歸窮
山幽谷於是爲邦百工集趣機巧萬端器械變通利民

無窮隣邦懷慕交揚益州書遣驛使冠蓋相望下民有
康哉之歌群后有歸功之緒莫匪嘉績克厭帝心即遷
州牧又遷安南將軍領州如故于時諸州或失土流播
或水潦沒害人民死喪百遺二三而君保元萬里至于
滄海聖朝欽亮析圭授上遣御史中丞鍾繇即拜鎮南
將軍錫鼓吹大車策命褒崇謂之伯父置長史司馬從
事中郎開府辟召儀如三公上復遣左中郎將祝耽授
節以增威重并督交揚二州委以東南惟君所裁雖周
召授分陝之任不遠過也交州殊遠王塗未夷夷民歸

附大小受命其郡縣長吏有缺皆來請之君權為選置
以安荒裔輒別上闡齊桓要刑封衛之義也武功既亢
廣開靡泮設俎豆陳壘秘行鄉射躋彼公堂篤志好
學吏民子弟受學之徒蓋以千計洪生巨儒朝夕講誨
閭閻如也雖洙泗之間學有所集方之無異也深愍末
學遠本離實乃令諸儒改五經章句刪刻浮辭妄除
煩重又求遺書寫還新者其故本於是古典畢集充
于州閭及延見武將文吏以令溫雅禮接優隆言不及
軍旅之事辭不逮官曹之上論三墳八索之典下陳

世教忠義之方內剛如秋
和外柔如春陽不伐其善不
有其庸如彼川流每往滋
邇可謂道理不才命世希有
者已仁者壽宜享期耆皇
天不弔年六十有七建安十
三年八月遘疾殞薨耕去
罷耜織女投杼老幼哀號若
喪父母時道路艱險留埴
州土轉移歸葬父兄其子妻
勉其夫欲共扶送至于鄉
里南陽太守樂鄉亭侯曼思
等言及志在州里者各各
卒具送靈柩之資子授微拜
五官中郎將乃䟽上請歸
葬本縣葬見聽許太和二年葬
于先塋於是臣故忻洽
以爲申伯韓侯之翼周室受

輅車乘馬玄裘赤舄之賜詩人詠功列于大雅至今不
朽况乎將軍牧二川歷二紀功載主府賜命優備賴而
生者毓子孕孫能不歌嘆乃作頌曰猗歟將軍膺期挺
生桓桓其武溫溫其仁初翰千里文顯使臣幕府禮命
集于北軍督齊禁旅如熊如龍奮然南顧綏我荆衡將
軍之來民安物豐江湖交壤刑清國興蔽芾其棠召伯
聽訟周人勿刻我賴其楨欲報之德胡不億年如何殂
逝孤棄萬民鐫勒墓石以紀洪勳昭示來世垂芳後昆

朱公叔墳前石碑

維漢二十一世延熹六年粵四月丁巳忠文公益州太守朱君名穆字公叔卒于京師其五月丙申葬于宛邑北萬歲亭之陽舊兆域之南其孤野受顧命曰古者不崇墳不封墓祭服雖三年無不於寢今則易之吾不取也爾其無拘于俗無廢予誠野欽率遺意不敢有違封墳三板不起棟宇乃作祠堂于邑中南曰陽里備器鑄鼎銘功載德懼墳封彌夷于平壤於是依德像緣雅則設茲方石鎮表靈域用慰其孤罔極之懷乃申詞曰歆惟忠文時惟朱父實天生德丕承洪緒彌綸典術允

迪聖矩好是貞厲疾彼強禦斷剛若仇柔亦不茹仍用明夷溝難受侮帝曰休哉朕嘉乃功命汝納言胤汝祖蹤父拜稽首翼翼惟恭謂篤不忘夙夜在公昊天不弔降茲殘殃不遺一父俾屏我皇我皇悼心錫詔孔傷位以益州贈之服章用刊彝器宣昭遺光子子孫孫永載寶藏

朱公叔鼎銘

忠文朱公名穆字公叔有殷之胄微子啓以帝乙元子周武王封諸宋以奉成湯之祀至元子啓生公子朱其

孫氏焉後自沛遷于南陽之宛遂大宋爵位相襲烈祖尚書令肅宗之世守于臨淮考曰實爲陳留太守乃及忠文克慎明德以紹服祖禰之遺風悉心臣事用媚天子顯允其勲蹟尋綜六藝契濶馳思所以啓前惑而覺後疑者亶亶焉雖商偃其猶病諸初舉孝廉除郎中尚書侍郎獨念運際存亡之要乃陳五事諫謀桀切退處畝畝以察天象驗應著焉孝順晏駕時繼江淮時辟大將軍府實掌其事用拜宛陵令非其好也遂以疾辭復辟大將軍再拜博士高第任侍御史明司國憲以齊百

僚矯枉董直罔肯阿順以黜其位潛于郎中群公並乃遷議郎登于東觀纂業前史於時冀州凶荒年饑民匱而貪婪之徒乘之爲虐錫命作牧靜其方隅乃據其化奮靈武昭令德塞群遠貞良者封植殘矣者芟夷夫惡除盜無俾比而作慝用陷于非辜復徵拜議郎病免官徵拜尚書清一以考其素正直以醇其德出納帝命乃無不允雖龍作納言山南喉舌靡以尚之享年六十有四漢皇二十一世延熹六年夏四月乙巳卒于官天子痛悼詔曰尚書朱穆立節忠亮世篤爾行虔恪機任

守死善道不幸而卒朝廷憫焉今使權謁者中郎楊賁
贈穆益州刺史印綬魂而有靈嘉其寵榮嗚呼哀哉肆
其孤用作茲寶鼎銘載休功俾後裔永用享祀以知其
先之德

陳留太守胡公碑

君諱碩字季獻交趾都尉之孫太傅安鄉侯少子也其
先與楚同姓別封于胡以國爲氏臻乎漢奕世載德不
替舊勲君幼有嘉表克岐克疑不見異物習與性成孝
于一親養色寧意蒸蒸雍雍雖曾閔顏萊無以尚也總

角入學治孟氏易歐陽尚書韓氏詩博綜古文周覽篇
籍言語造次必以經綸加之行已忠儉事施順恕公體
所安與衆共之驕吝不萌於內喜愠不形於外可謂無
競伊人溫恭叔慎者也初以公在司徒除郎中宿衛十
年遭叔父憂以疾免州郡交辟皆不就後以大將軍高
第拜侍御史遷諫議大夫以將軍事免官舉賢良方正
不詣公車建寧元年召拜議郎納忠盡規匪懈于位遷
侍中虎賁中郎將是年遭疾屢上印綬詔書聽許以侍
中養疾其年七月被尚書召不任應命詔使謁者劉悝

賈印綬即拜陳留太守君聞使者至加朝服拖紳使者致詔君以手自繫陳辭謝恩其明二十一日遣吏奉章報謝意氣精朗是日疾大漸刻漏未分奄忽而卒時年四十一天子憫悼詔使者王謙送葬以中牢具祠賜錢五萬布百疋贈穀三千斛同位畢至赴吊雲集生榮未艾沒有餘哀於是遐邇搢紳爰暨門人相與嘆述君德追痛不宣恒切情愴無不求懷行由已作名自人成先民既邁賴茲頌聲嗟我明哲如何勿銘乃作辭曰猗歟懿德令聞有彰祗服其訓克構克堂孝思唯則文藝不

光敦厚忠恕衆悅其良綬弱以仁不云我強爰且登朝進退以方見幾而作如鴻之翔乃位常伯恪處左右兼掌虎賁禁戒允理邁茲虛痾帝用悼止俾守陳留庶篤其祉王人既詔景命不俟嗚呼昊天殲我英士如何贖也命不自已哀哉永傷萬年是紀

太守胡公碑銘

君諱碩字季獻交趾都尉之孫太傅安樂侯之子也順帝時爲郎中桓帝時遭叔父憂以疾自免荊州將軍每辟輒辭疾後以高等拜侍御史遷諫議大夫舉賢良方

正病不詣公車建寧元年七月拜陳留太守病加不任
應召詔使謁者劉惔即授印綬二十一日卒詔遣使者
王謙以中牢具祠特賜錢五萬布一百疋贈穀三千斛
儔類赴送遠近鱗集於時陳留主簿高吉蔡軫等咸以
郡選充備官屬來迎者三十四人奔驚跋涉願承清化
逢天之戚不獲延柩痛心絕望切怛末慕乃相與衰經
庭位號咷靈柩將窆申勅脩儀夜在輿服寮御部引各
執其職路人感愴觀者嘆息遂樹碑作銘以表令德於
潁下國瞻仰俊又欽見我君爰綴我惠式昭績愍有勞

其粹昊天不吊景命顛墜悠悠蒸黎惆悵喪氣政
宣古之遺愛祁祁我君習習冠蓋修誠以迓曾不東
靈魂徘徊靡所瞻逮惟其傷矣會肝摧碎勒銘告哀傳
千萬代

琅邪王傅蔡公碑

君諱朗字仲明蓋倉頡之精胤姬稷之末胄也昔叔度
文王之昭建侯于蔡以國氏焉迄于平襄周祚微缺王
室遂卑齊晉交爭強楚侵陵昭侯徙于州來公族分遷
是家于國奕葉載德常歷宮尹以逮于茲君雅操明允

威厲不猛履孝悌之性懷文藝之才包洞典籍刊摘沉
秘知幾達要通令神契既討三五之術又采二南之業
以魯詩教授生徒雲集莫不自遠並至栖遲不易其志
簞食曲肱不改其樂心棲清虛之域行在玉石之間是
以德行儒林智周當代四岳稱名帝曰予聞元和元年
徵拜博士舒演奧秘贊理闕文所立卓爾度躡雲蹤其
選士也抑頑錯枉進聖擢偉極遺逸於九臯揚明德於
側陋拔茅以彙幽帶用齊加以清敏廣平好是正直規
誨之策日諫王庭忠謹著烈令聞流行聖朝以藩國

先帝遺體或以繼絕襲位正於阿保未洽雅訓驕盈
信差或蹈憲理非弘直碩儒莫能匡弼蔡君審行修德
進退可度遷河間中尉琅邪王傅乃從經術之方示以
柔謀之威率禮莫違其國用靖雖安國之輔梁孝仲舒
之相江都靡以加焉勲績既盛帝簡其功將授上位遷
于紫宮賦壽不永遽此疾凶年五十八未與六年夏卒
嗚呼哀哉凡百君子咨痛罔極歎懷傷悼含涕流慟如
何昊天喪我師則爰勒斯銘式昭其德天敏明哲於赫
我君含弘光大玄覽孔真潛樂教思韞玉衡門雲龍感

應養徒三千珠藏外耀鶴鳴聞天若時徵庸登祚王臣
綜彼前疑定此典文叅佐七德俾相大藩身沒稱顯未
遺令勲表行揚名垂示後昆

汝南周巨勝碑

君諱勰字巨勝陳留太守之孫光祿勲之子也君應坤
乾之淳靈繼命世之期運玄懿清朗貞厲精粹體仁足
以長人嘉德足以合禮總六經之要括河洛之機援天
心以立鈞贊幽明以揆時沉靜微密淪於無內寬裕以
博含乎無外巨細洪纖罔不總也是以實繁於華德盈

平譽初以父任拜郎中疾去官察孝廉是時郡守梁氏
外戚貴寵非其好也遂以病辭太守復察孝廉乃俯而
就之以明可否然猶私存衡門講誨之樂不屑已也又
委之而旋故大將軍梁冀專國作威海內從風世之雄
材優逸之徒莫不委質從命而顛覆者蓋亦多矣聞君
洪名前後三辟卒不降身由是搢紳歸高群公事德大
尉司徒再辟三辟察賢良方正州舉孝廉皆病不就擾
攘之際災眚仍發聖上詢諮師錫策公車特徵君仰瞻
天象俯察人事世路多險進非其時乃托疾杜門靜居

里巷無人跡外庭生蓬蒿如此者十餘年強禦不能奪
其守王爵不能滑其慮至延熹二年乃更闢門延賓享
宴娛樂及秋而梁氏誅滅十二月君卒然則識幾知命
可觀於斯矣洋洋乎若德雖崇山千仞重淵百尺未足
以喻其高究其深也夫三精垂耀處者有表爰在上世
作者七人焉有該百行備九德齊光日月洞靈神明如
君之至者與育所謂天民之秀也豈年五十不登期考
遐邇歎悼痛心矢圖乃相與建碑勒銘以旌休美其辭
曰厥初生民天賜之性有龐有醇有否有聖伊惟周君
允卜其政誕茲明德自貽哲命煥乎其文如星之布確
乎不拔如山之固追踪先緒應期作度潛心大猷覃思
德謨遁世無悶屢辭王寮洋洋泌丘于以逍遙篋爾童
蒙是訓是教瞻彼榮寵譬諸雲霄優哉游哉侔此弘高
名振華夏光耀昆苗清風丕揚德音孔昭

彭城姜伯淮碑

先生諱肱字伯淮彭城廣人也其先出自帝胤在皇唐
蓋與四岳共葉能禮於神舜命秩宗爰封于呂其裔曰
望佐周克殷俾侯齊國姓有姜氏即其後也高祖祖父

皆豫章太守穎陰令先生既蹈先世之純德體英妙之
高姿立性純固百行脩備故其平生所能事親惟孝如
大舜五十而慕友于兄弟有常棣之華萼韡之度體惠
理和有上德之素安靜守約恩及嬰兒至操動信邑中
化之外戶不閉治藏無隱及其學而知之者三墳五典
八索九丘俯仰占候推步陰陽有名物定事之能獨見
先覩之効然猶學而不厭誨人不倦童冠自遠方而集
者蓋千餘人夫水盈而流德交而形是故德行外著洪
聲遠布華夏同稱名振當世凡十辟公府九舉賢良方

正公車特徵玄纁禮聘又家拜犍爲太守太中大夫先
生盤桓育德莫之肯就不隕穫於貧賤不充訕於富貴
拔乎其萃出乎其類生民之傑也年七十有七建安二
年四月辛巳卒於是從遊弟子陳留中屠蟠等悲悼傷
懷懼微言之欲絕感絕倫之盛事乃建碑於墓甄述景
行邈矣先生應天淑靈孝友是備上德是經弘此文藝
耽怡是寧恂恂善誘童冠來誠有燁其譽有煥其聲顯
顯群公並加辟命赫赫聖皇仍獲其聘委策避國守此
玄靜綽乎其裕確乎其操疇昔洪崖雙名並高嗟乎殞

沒搢紳永悼依依我徒靡則靡効勒銘金石彌遠益曜

貞節先生范史雲銘

先生諱丹字史雲陳留外黃人陶唐氏之後也其在周室有士會者爲晉大夫以受范邑遂以爲氏漢文景之際爰自南陽來家于成安生惠延熹二年官至司農廷尉君則其後也君受天正性志高行潔在乎幼弱固已藐然有烈節矣時人未之或知屈爲縣吏亟從仕進非其好也退不可得乃託死遁去親戚莫知其謀遂隱窟山中涉五經覽書傳尤篤易與尚書學立道通義而後

歸遊集太學知人審友苟非其類無所容納介操所在不顧貴賤其在鄉黨也事長惟敬養稚惟愛言行舉動斯爲楷式郡縣請召未嘗出節其有備禮招延虛已迂止亦爲謀奏盡其忠直以處士舉孝廉除郎中萊蕪長未出京師喪母行服故事服闋後還郎中君遂不從州郡之政凡其事君過則弼之闕則補之通清夷之路塞邪枉之門舉善不拘階次黜惡不畏強禦其事繁多不可詳載雅性謙儉體勤能苦不樂假借與從事荷負徒行人不堪勞君不勝其逸辭太尉府俄而冠帶或以群

黨見嫉時政用受禁錮君罹其罪閉門靜居九族中表
莫見其面晚節禁寬困於塵空而性多檢括不治產業
以爲卜筮之術得因吉凶道治民情以受薄償且無咎
累乃鬻卦于梁宋之域好事者覺之應時輒去禁旣蠲
除太尉張公司徒崔公前後四辟皆不就仕不爲祿故
不牽於位謀不苟合故特立於時是則君之所以立節
明行亦其所以後時失途也年七十有四中平二年四
月卒太尉張公兖州劉君陳山太守淳于君外黃令劉
君僉有休命使諸儒參按典禮作誄著謚曰貞節先生

昭其功行錄記所履謀於耆舊刊石樹銘光示來世於
顯貞節天授懿度誕茲明哲允迪德譽如淵之清如玉
之素涵之不濁涅之不汙用行思忠舍藏思固伯夷是
師史鮪是慕榮貧安賤不悵窮迂其死善道遺名之故
身沒與存休聲載路

玄文先生李子材銘

玄文先生名休字子材南陽宛人也其祖李伯陽周柱
下史覲衰世而遁焉其後雄俊豪傑往往崛起自戰國
及漢名臣繼踵支胄散逸其遷于宛尚矣王莽竊位漢

祚中移考翼佐世祖匡復郊廟錫封茅土卿相牧守于
時相逐休少以好學游心典謨既綜七經又精群經鉤
深極奧窮覽妙旨居則玩其辭動則察其變雲物不顯
必考其占故能獨見前識以先神意若古今常難疑義
錯繆前人所希論後學所不覽休盡剖判剝散幽暗靡
不昭爛猶發憤於日所不覩體所不聞遂登東岳觀百
王遺風習容闕里以協禮衷退而講誨童冠仰焉傳傳
如也郡署五官掾功曹司空胡公顯以儒譽特進大鴻
臚仍優禮固請秉讓執虛辭此三命不爲利回不爲

致辭寵審已不動其守可謂純潔皓素綽有餘裕者已
其於鄉黨細行敦睦九族篤信交友不可得而詳也初
娶配出後配未字年既五十苗胤不嗣以求壽二年夏
五月乙未卒凡其親昭朋徒相與大會而葬之鼎俎之
禮節文曲備時令戴君臨喪命謚郡遣丞掾冠蓋咸屆
既定而後罷焉於是故好朋舊僉以仲尼既沒文不在
茲韞積美玉喪莫賈之求而無繼悽爾求思乃刊斯石
懿德是不吁茲先生秉德恭勤天啓哲心其學孔純經
緯是綜雅麗是分行已守道匪禮不遵處約不戚聞寵

不欣榮不能華威不能震天淑厥命以讓以仁有惠云
載惟邦之珍按典考謚謚以玄文身沒名彰配黔作隣
遺譽罔極丕昭億年嗚呼哀哉

處士函叔則銘

伊漢二十有一世處士有函典字叔則者夫其生也天
真淑性清理條暢精微周密包括道要致思無形深總
曆部織入藝文藻分葩列如春之榮守根據窮不虛其
聲偉德若茲惟世之英乃遂隱身高數稼穡孔勤童蒙
來求彪之用文不義富貴譬諸浮雲州郡禮招休命交

集徒加名位而已莫之能起也博士徵舉至孝耻已處
而復出若有初而無終潔耿介於丘園慕七人之遺風
年七十有五建寧二年六月卒臨沒顧命曰知我者其
蔡邕乃爲銘載書休矣俾來世昆裔永有諷誦於先生
之德其辭曰民之齊敏卓時挺生思心精叡綜物通靈
術有玄妙于時游情聞道睹異惕然若驚守死善操與
世無營渾其若濁徐然後清綽其若煥終其益貞有恒
實難獨秉其經嗟爾來世是瞻是聽

陳留索昏庫上里杜銘

曰社祀之建尚矣昔在聖帝有五行之官而共工子句龍爲后土及其沒也遂爲社祀故曰社者土地之主也周禮建爲社位左宗廟右社稷戎醜攸行於是受服土膏恒動於是析農又頒之于兆民春秋之中命之供祠故自有國至于黎庶莫不祀焉惟斯庫里古陽武之戶牖鄉春秋時有子華爲秦相漢興陳平由此社宰遂佐高帝克定天下爲右丞相封曲逆侯永平之世虞延爲太尉司空封公至嘉平延弟曾孫放字子卿爲尚書外戚梁冀乘寵作亂首策誅之王室以績封召都亭侯太

僕大常司空毗天子而維四方克措其功往烈有常於里同監爰暨邦人僉以爲宰相繼踵咸出斯里秦一漢三而虞氏世焉雖有積善餘慶修身之致亦斯社之所相也乃與樹碑作頌以示後昆唯王建祀明事百神乃顧斯社于我兆民明德惟馨其慶聿彰自嬴及漢四輔代昌爰我虞宗乃世重光元勳既立錫茲土疆乃公乃侯帝載用康神人協祚且巨且長凡我里人盡受嘉祥刊銘金石永世不忘

京兆樊惠渠頌

洪範八政一曰食周禮九職一曰農有生之本於是乎
出貨殖財用於是乎在九土上沃爲大田多稔然而地
有埆墾川有墊下溉灌之便行趨不至明哲君子創業
農事因高卑之宜驅自行之勢以盡水利而富國饒人
自古有焉若夫西門起鄴鄭國行秦李冰在蜀信臣治
穰皆此道也陽陵縣東其地衍隩土氣辛螯嘉穀不植
草萊焦枯而涇水長流溉灌維首編戶齊氓庸力不供
牧人之吏謀不暇給蓋常興役猶不克成光和五年京
兆尹樊君諱陵字德雲勤恤人隱悉心政事苟有可以

惠斯人者無聞而不行焉遂諮之郡吏申於政府僉以
爲因其所利之事者不可已者也乃命方略大史麴遂
今伍瓊揣度計慮揆程經用以事上聞付在三府司農
遂取財於豪富借力於黎元樹柱累石委薪積土基趾
工堅體勢強壯折湍流欵曠坡會之於新渠疏水門通
窬瀆灑之於畝畝清流浸潤泥濘浮游昔日鹵田化爲
甘壤梗黍稼穡之所入不可勝筭農民熙怡悅豫相與
謳談疆畔斐然成章謂之樊惠渠云其歌曰我有長流
莫或遏之我有溝澮莫或達之田疇汗鹵莫脩莫釐飢

饑困悴莫恤莫思乃有樊君作人父母立我畎畝黃潦
膏凝多稼茂止惠乃無疆如何勿喜我壤旣營我疆斯
成泯泯我人旣富且盈爲酒爲醴蒸彼祖靈貽福惠君
壽考且寧

京兆尹樊德雲銘

於顯哲尹誕德孔彰膺帝休命謂篤不忘爰納忠式規
悟聖皇欽崇園邑大孝允光九命車服昭示采章軒輶
四牡承祀蒸嘗多士時貢徃役求息道路孔夷民清險
棘同體諸善兆

九疑山銘

巖巖九疑峻極于天觸石膚合興播連雲時風嘉雨浸
潤下民芒芒南土實賴厥勛逮于虞舜聖德光明克諧
頑傲以孝蒸蒸師錫帝世堯乃授徵受終文祖璇璣是
承泰階以平人以有終遂葬九疑解體而升登此崔嵬
託靈神仙

焦君贊

猗歟焦君常比玄墨衡門之下栖遲偃息泌之洋洋樂
以忘食鶴鳴九臯音亮帝側迺徵迺用將受袞職皇天

不吊賢人。講慮不獲一志。并此四國。如何穹蒼。不照斯域。惜哉朝廷。喪茲舊德。恨伊學士。將何法則。

王子喬碑

王孫子喬者。蓋上世之真人也。聞其仙舊矣。不知興於何代。博問道家。或言潁川。或言彥蒙。初建斯域。則具斯丘。傳承先人曰。王氏墓。紹胤不繼。荒而不祠。歷載彌年。莫之能紀。暨于永和元年。十有二月。當臘之夜。上有哭聲。其立音甚哀。附居者往聞而恠之。明則登其墓。察焉。洪雪下無人踪。見一大鳥跡。有祭祀之處。左右或以爲神。

其後有人着絳冠。大衣杖竹策。立冢前。呼樵孺子。禿謂曰。我王子喬也。爾勿復取吾先人墓前樹也。須臾忽然不見。時令太山萬熙稽古老之言。感精瑞之應。咨訪其驗。信而有徵。乃造靈廟。以休厥神。於是好道之儔。自遠來集。或絃歌以詠。太一或談思以歷。丹田其疾病。疴瘵者。靜躬祈福。即獲柞。若不虔恪。輒顛踣。故知至德之宅。兆真人之先祖也。延熹八年秋八月。皇帝遣使者奉犧牲。以致祀祗懼之敬。肅如也。相國東萊王章。字伯義。以爲神聖所興。必有銘表。昭示後世。是以賴鄉仰伯陽。

之踪關民慕尹喜之風乃會長史邊乾訪及士隸遂樹
玄石紀遺烈俾志道者有所覽焉詞曰伊王君德通靈
含光耀秉純貞應大道羨久榮棄世俗飛神形翔雲霄
浮太清乘螭龍載鶴軒戴華笠奮金齡揮羽旗曳霓旌
權罔極壽億齡昭篤孝念所生歲終闕發丹情存墓冢
舒哀聲遺鳥跡覺舊城被絳衣垂紫纓呼孺子告姓名
由此悟感怖驚修祠宇反几筵饋饋進甘香陳時傾頌
馨明禋匡流祉熙帝庭祐邦國相黔民光景福耀無垠
漢交趾都尉胡夫人黃氏神誥

夫人江陵黃氏之季女字曰列羸其先出自伯翳別封
于黃以國焉高祖父汝南太守曾祖父延城大尹祖
父番禺今父以主簿嘗證太守事奉明君以立臣節漢
南之士以為美談初都尉尹娶于故豫州刺史即黃君
之姊生太傅安樂侯廣及卷今康而卒繼室以夫人生
童紀未齒而天夫人懷聖德之姿藹慈母之仁撫育二
孤導以義方思齊先姑神時恫故能迄用有成誕膺
繁祉廣歷五卿七公再封之祿康亦由孝廉宰牧二城
九鼎之義夫人是享爰暨孫更仕三宮或典百里或

作虎臣銀艾貂蟬近侍顯受茲介福于我夫人自郡尉仕于京師及廣見第式以漢朝夫人居京師六十有餘載其乘輅執贄朝皇后以柔桑于蚕宮手三盆于繭館者蓋三十年上有帝室配光之休下有堂宇斤斤之柞心耽其榮體安其玄遠圖長慮用遺舊居欲留此焉康寧之時亟以爲言太夫八年九十一建寧二年薨于太傅府是月辛酉公之季子陳留太守碩卒于洛陽左池里舍公衞哀悼祗慎其屬遵奉遺意不敢失墜乃俾元孫顯咨度群儒以考其衷僉曰昔帝舜沒於蒼梧殞

於虞郊二妃薨於江湘不即兆于九疑延陵季子寔惟吳人長子道終卜葬羸博夫遭時而制不遠遷徙鬼氣所之不繫丘壠帝舜以之神罔時怨季札以之仲尼嘉焉鑒帝籍之高論綜精靈之幽情稽先人之遐迹順母氏之所寧茲事體通而義同允不可替於是公乃爲辭昭告先考然後卜定宅兆龜筮悉從遂營窆室之事舉封樹之禮十月既望粵翌日巳酉葬我夫人黃氏及陳留太守碩于此高原雒陽東界關亭之阿天子使中常侍謁者李納吊且送葬持賻錢二十萬布二百疋再以

中牢祠群后畢會榮哀孔備于時濟陽故吏舊民中常
侍勾陽于肅等二十三人思應慕化推本議銘著斯碑
石俾諸昆裔瞻仰以知禮之用是爲神語乃申頌曰於
穆夫人家邦之媛昔在嬴代黃國氏建至于近祖亦降
于漢天祚明德福祿流行旣作母儀履信思順登壽考
耆用永蕃變子孫以仁追稽先典厯茲洛濱齊跡湘靈
配名古人休矣耀光千億斯年

太傅安樂侯胡公夫人靈表

夫人編縣舊族章氏之長女也字曰顯章令儀小心秉

操塞淵仁孝婉順率禮無遺體季蘭之姿蹈思齊之跡
未初二年年十有五爰初來嫁誕成家道仰奉慈姑竭
歡致敬俯誨膝下化導周悉至德修於幾微徽音暢於
神明故能參姪妣之功兼生人之榮朝春路寢贊桑蚕
宮光寵有祭祭服有琬前後奉斯禮者三十餘載夫人
生五男長曰整伯齊次曰千億叔譚次曰寧稗威次曰
碩季獻伯仲各未加冠遭厲氣同時夭折叔上郡孝廉
季更歷州寧舉茂才葉令京令爲議郎季以高第爲侍
御史諫議大夫侍中虎賁中郎將陳留太守皆早即世

夫人哀悼劬悴由是被疾遭太夫人憂篤年七十七建
寧三年薨夫人之存也契濶中饋婉戀供養依生奉仁
紹述雅意其閨月附于太夫人窀穸于茲地魂而有靈
欽明定省神心欣焉其實寧之元女金盈追慕永思憐
恒罔極遂及斯表鐫著堅珉頌曰悲母氏之不末懷殷
恤以摧傷惟子道之無窮惜聞誨之未央庶黃耆以期
頤胡委我以夙喪恒思心以激切亦割肝以絕腸昔先
聖之遺辭言仁者其壽長嗟母氏之憂患體愷悌以慈
良失延年之報枯獨何棄於穹蒼日月忽以將暮抱長

結以含愁尋脩念於在昔原疾病之所由遭元子之弱
天心傷悴以自憂既叔季之殞終哀情結以彌綢皇姑
沒而中感遂大漸兮速流疾燄燄而日邁氣微微以長
浮銷精魂以遐翔曾不可乎援留爾乃順旨於冥冥繼
存意於不違爰附靈於皇姑尚魂魄之有依潛幽室之
黯漠惜此明之景輝一往超以未及傾祖邈其彌遲顧
新廟以累欵伏几筵而增悲嗟既逝之益遠眇悠悠而
莫追

司徒袁公夫人馬氏碑銘

維光和七年司徒袁公夫人馬氏薨其十一月葬哀子
懿達仁達銜恤哀痛靡所爲懷乃撰錄母氏之德履示
公之門人親文感義采石于南山諮之群儒假貞石以
書焉夫人右扶風平陵人也曾祖中水侯祖將作大匠
考南郡太守中水侯弟伏波將軍女在淑媛作合孝明
誕生孝章婚姻帝室世爲名族夫人生應靈和德精性
妙角犀豐盈寶有備素溫慈惠愛慎而寡言幼從師氏
西禮之教早達窈窕德象之儀及笄求匹明哲供治婦
業孝敬婉孌畢力中饋後生仰則以爲謀憲自公歷據

王官至宰相夫人營克家道扶翼政事聰明達乎中外
隱括及乎無方不出其機化導宣暢童子無驕逸之猶
婦妾無捨力之愆故能窮生人之光寵獲福祿之豐報
朝春政於王室躬桑繭於蠶宮春秋六十有三寢疾不
求懿等追想定省尋思髮鬢哀窮念極不知所裁乃申
辭曰於穆母氏其德孔休思齊先始百行聿脩宣慈惠
和恩澤並周義方之訓如川之流俾我小子蒙昧以滌
不享遐年以求春秋往而不返潛淪大幽嗚呼哀哉几
筵虛設幃帳空陳品物猶在不見其人魂氣飄飄焉所

安神兄弟何依姊妹何親號咷切怛曾不我聞吁嗟上天何辜而然傷逝不續往者不旋

濟北相崔君夫人誄

維延熹四年故濟北相崔夫人卒嗚呼哀哉世喪母儀宗殞憲師哀哀孝子靡所瞻依凡百赴吊至止增悲投涕歔歔共叙赫姿乃爲誄曰清和有鑠時惟哲母令儀令色爰以資始塞淵其心淑慎其止于母斯勤在子斯敏仰覽篇籍俯釐絲景多才多藝于何不有休譽邈焉允女之英乃及崔君惟德是行其德伊何實粹實明虔

恭事幾劫潤中饋敦此婉順疾彼攸遂思齊徽音晨興夜寢穆穆其猷莫之與二天祚明德底之方較於赫崔君膺茲祉祿夫人有胤翼此清淑仁風溫潤義惠優渥推恩中外施浹族食不兼膳服不織縠以儉爲榮以奢爲辱堂堂其胤惟世之良于其令母受茲義方訓以柔和董以嚴剛怒不傷愛喜不亂莊納之軌度終然允臧是用登濟享其寵光雖則崇盛猶匪寧息同其婦子茂師其職服貴無荒尊不舍力密勿不忘惟德之極昔在共姜陪臣之母勞謙紡績仲尼是紀矧茲夫人帝室

命婦猶日孜孜復禮克己人亦有言仁者壽長宜登求
年黃耆無彊昊天不吊降此殘殃寢疾彌留精爽悴傷
慘怛孝子惴惴其惶靡神不舉無藥不將嗚呼哀哉於
是孝子長叫氣絕復蘇號呼告哀不知其辜昊天上帝
忍吊遺孤尋想遊靈焉識所徂嗚呼哀哉既殯神柩薄
言于歸冢宰喪儀循禮無遺切切喪主瘠羸哀哀情兮
長慕涕兮無晞行旅揮涕千里于咨乃謀卜筮言考其
良建彼兆域于時翳藏冥冥窈窈無時有陽燈燭既滅
馬道納光形影不見定省何望嗟其哀矣不可弭忘日

月代序古有如喪由斯夫人節烈有章配質士彥既隆
且昌顧景赫奕饋供孔將惟以慰懷庶無末傷嗚呼哀
哉

議郎胡公夫人哀讚

議郎夫人趙氏字曰末姜允有令德秉心塞淵舒詳閒
雅儀節孔備女師四典窈窕德象罔不習熟以供婦道
議郎早世檢誨幼孤義方以導其性中禁以閑其情孤
顯儉節用免咎悔少辟侍中襲先公之爵以議郎出爲
濟陰太守是時夫人寢疾未薨而國家方有榮陽寇賊

震驚帝師簡選州辟授任進衛不得辭王命親醫藥夫
人乃自矜精稟氣力俛起若愈以勸遣顛到官月餘所
疾暴盛春秋五十八中平四年薨于京師顛有剖符之
寄偪於國典疾篤不得顧親增感氣絕不能自省慎終
之事闕焉末廢雖不毀以隨沒亦因悴而傷懷知我如
此不如勿生號咷告哀以乞骸骨踰年然後獲聽追惟
考君存時之命迎棺舊土同穴此城孤心摧割靡所底
念仰瞻二親或有神誥靈表之文敢曰亮闇叙我憂痛
作哀讚書之于碑愍予小子夙罹孔艱嚴考殞沒我在

紀年母氏鞠育載於載

勤斯慈愛備存匪惟驕

之範我軌度教誨嚴肅昭示好惡俾我克類畏威忌怒
用免咎悔踐繼先祖即爵其二將是臨與帝剖符守
于濟陰夫人寢疾榮此寵休疾用歡痊翊日斯瘳將征
將邁從養陶丘景命徂逝不愍少留疾大漸以危亟兮
精微微而浸衰逼王職於憲典兮子孫忽以替違目不
臨此氣絕兮手不親夫含飯陳衣衾而不省兮合綬棺
而不見昔予考之即世兮安宅兆于舊邦依存意以奉
亡兮遷靈柩而同來考妣痛以慘兮離乖神柩集而移

今增哀黃墟密而無間今出入閭其無門昇柩在茲今
不知魂景之所存悼孤衷之不遂今思情慄以傷肝幽
情淪於后坤今精哀達乎昊乾

郡掾史張玄祠堂碑銘

掾諱玄字伯雅河南偃師人也其先張仲者實以孝友
爲名左右周室大漢初興張蒼爲丞相封北平侯其後
自河內遷于茲土世爲顯姓掾天安恭恪宣慈惠和允
恭博敏惻隱仁恕正身履道以協閭庭損用節財以贍
疏族動中規矩言合典式不知名彰不飾行者可謂仁

粹淑貞自然之素者已論焉嘉之州郡禮招署致掾史
沉靜寡欲不求榮祿是以豐於天爵薄於人位某月以
遭疾而卒掾孫翻以貞固之質受過庭之訓獲執戟出
宰相邑遷太守得大夫之祿奉丞嘗之祀尋原柩之所
由而至於此先考積善之餘慶陰德之陽報乃於是立
祠堂假碑勒銘式明令德以示乎後辭曰於惟我考允
迪懿德治信斯順其儀不忒仁惠周洽行惟模則篤垂
餘慶貽此燕翼邇矣遺孫用懷多福刊名金石流于罔
極

袁滿來碑銘

茂德休行曰袁滿來太尉公之孫司徒公之子逸才淑
姿實天所授聰遠通敏越戲在闕明習易學從誨如流
遇目能成事不再舉問一及三具始知終情性周備夙
有奇節孝智所生順而不驕篤友兄弟和而無忿氣決
泉達無所凝滯雖冠帶之中士校材考行無以加焉七
公族之殊異國家之輔佐衆律其器士嘉其良雖則童
稚令聞芬芳降生不末年十有五四月壬寅遭疾而卒
既苗而不穗凋殞華英嗚呼悲夫乃假碑旌于墓表嗟


其傷矣惟以告哀

童幼胡根碑銘

故陳留太守胡君子曰根字仲原生有嘉表幼而克才
角犀豐盈光潤玉顏聰明敏惠好問早識言語所及智
思所生雖成人之德無以加焉稟命不長夙罹凶災年
七歲建寧二年遭疾夭逝慈母悼痛昆弟孔懷感極柩
之親愛憐國城之乖離乃權宜就封二祖墓側親屬李
陶等相與追慕先君悲悼遺嗣樹碑刊辭以慰哀思辭
曰於惟仲原應氣淑靈實有令儀而氣如瑩明之之性

與體俱生聞言斯識覩物知名傳者太勤受誨則成柔
和順美與人靡爭忿不怨懟喜不驕盈當受福末爲光
爲榮如何昊天降此短齡惜繁華之方曄兮望嚴霜而
凋零嗟童孺之夭逝兮傷慈母之肝情從皇祖乎靈兆
兮庶神魄之斯寧哀慘戚以流涕兮念污軫之不呈顧
求懷於不朽兮乃託辭於斯銘

漢蔡中郎集卷之六終



所
圖
書

